



# ILIDZA

INFORMATIVNI BILTEN  
OPCINE ILIDZA

Ilidza • Oktobar 2017  
• Broj 164







## Utvrđen Nacrt Budžeta za 2018. u iznosu od 24.500.000 KM

**O**pćinsko vijeće Ilidža je na sjednici 26. novembra 2017. u Multifunkcionalnoj sali sa 16 glasova ZA, sedam pro-

tiv i tri suzdržana utvrdilo Nacrt Budžeta Općine Ilidža u iznosu 24.500.000 KM i uputilo ga na javnu raspravu u trajanju od deset radnih dana, od 26. oktobra do 15. novembra 2017. Zadužen je Općinski načelnik da putem MZ organizuje i provede javnu raspravu.

Nacrt Budžeta za 2018. godinu sa rasporedom održavanja po mjesnim zajednicama objavit će se na oglasnoj ploči općine, mjesnih zajednica, te web stranici, kako bi se građani informisali o terminima i aktivno učestvovali i kreirali budžet po svojoj mjeri. Program rada Javnog preduzeća "Ilidža" će u Prijedlogu Budžeta biti uvršten u grant kapitalnih transfera, kao i iznos od 500.000,00 KM za imovinsko rješavanje i izgradnju škole na MZ Stup II, te 100.000,00 KM za JU KSIRC Hrasnica-Ilidža, neki su od zaključaka Općinskog vijeća donesenih na sjednici. Vijeće je zadužilo općinskog načelnika da za narednu sjednicu Općinskog vijeća podnese izvještaj o rezultatima javne rasprave i pripremi Prijedlog budžeta za 2018. godinu. Prema nacrtu obezbjeđena su sredstva za redovan rad službi, komisija i vijeća, a između ostalog, planirano je za obrazovanje 469.000 KM, kulturu 395.000 KM, vjerske objekti 300.000 KM i kapitalne grantove 6.300.000 KM.

## Imenovani članovi Komisije za sigurnost

Na sjednici je donesena i Odluka o obrazovanju komisije za sigurnost kao privremenog tijela. Komisija ima predsjednika i šest članova. U sastavu komisije su: Amel Pintol, Redžo Lemezani, Miro Grbavac, prof. dr. Senaid Memić, Muhamed Omerović, Enes Čorbo i Idriz Efendić. Komisija je imenovana za mandat 2016-2020. godine i radit će bez novčane naknade.

## Izvještaj o izvršenju Budžeta za devet mjeseci

**P**red vijećnicima Općinskog vijeća Ilidža bio je i izvještaj o izvršenju budžeta za devet mjeseci 2017. godine. Podsjećamo da je Budžet Općine Ilidža za 2017. godinu 33.300.000 KM. Izvršenje za prvih devet mjeseci kad su u pitanju prihodi iznosi 26.540.475,73 ili 79,70 posto, a rashodi 16.591.787,76 KM ili 49,83 posto. Najveća izdvajanja bila su za kapitalne projekte i to izgradnju saobraćajnice (rješavanje imovinsko-pravnih odnosa) Ilidža-Hrasnica 565.192,63 KM, uređenje Male Aleje 252.647, 75 KM, asfaltiranje ulica s učešćem građana 232.256 KM, javnu rasvjetu 151.623 KM, čišćenje vodotoka 570.552 KM. Za prvih devet mjeseci za sport je dato 326.861 KM, udruženjima građana 651.740 KM, za socijalne pomoći i teško oboljela lica 581.235 KM.

## Data saglasnost načelniku da pregovara sa Federalnim zavodom za PIO

**O**pćinsko vijeće dalo je i saglasnost Općinskom načelniku da pregovara sa Federalnim zavodom u vezi pokretanja postupka prodaje nekretnina u vlasništvu Zavoda i općine, a na zemljištu na kojem se nalazi devastirani objekat Doma penzionera u Nedžarićima, kao i da prijedlog sporazuma o međusobnim pravima i obavezama između općine i Federalnog zavoda dostavi Pravobranilaštvu na pravno mišljenje te Općinskom vijeću na saglasnost.



## Izvještaj o radu i finansijskom poslovanju JU KSiRC Ilidža

Općinsko vijeće je na sjednici usvojilo Izvještaj o radu Javne ustanove kulturno-sportski i rekreacioni centar Ilidža i Izvještaj o finansijskom poslovanju za period 1. januar-30. juni 2017. godine.

Kulturno-sportski i rekreacioni centar je Javna ustanova od posebnog društvenog interesa čiji je osnivač Općina Ilidža, kroz čiju se programsku aktivnost i djelatnost zadovoljavaju potrebe stanovnika i udruženja sa područja općine Ilidža i šire u oblasti sporta, kulture i rekreacije. U tom pravcu učinjeni su značajni napori na poboljšanju uslova za održavanje kulturnih i sportskih manifestacija od lokalnog, državnog i međunarodnog značaja. Aktivnosti u izvještajnom periodu realizovane su u objektima univerzalne sportske dvorane, dvorane za boričake sportove, otvorene sportske plohe, ljetne pozornice i multimedijalne sale, a odvijale su se kroz nastavu sporta, utakmice, treninge, rekreaciju, sportske i kulturne manifestacije. U proteklom periodu izvršena su značajna ulaganja u nabavku opreme i sanaciju objekata, a ostvareni su pozitivni finansijski rezultati.

## Odluka o izmjenama i dopunama odluke o Pravobranilaštvu Općine Ilidža

Općinsko vijeće je na devetoj sjednici donijelo Odluku o izmjenama i dopunama odluke o pravobranilaštvu Općine Ilidža, a na osnovu Zakona o izmjenama i dopunama zakona o pravobranilaštvu Kantona Sarajevo.

Najvažnije izmjene odnose se na odgovornost i sankcije prema licima koja ne postupe po zahtjevima pravobranilaštva, te lična odgovornost lica čijim je neblagovremenim postupanjem odnosno nepostupanjem nastala šteta za zastupani organ u vidu obaveze naknade štete. Izmjene se odnose i na uslove za obavljanje funkcije pravobranioca, zamjenika pravobranioca i stručnog saradnika u pogledu dužine radnog iskustva, te mogućnost primanja pripravnika i volontera radi stručnog osposobljavanja. Izmjene se odnose i na utvrđivanje plaće i naknade pravobranica i zamjenika pravobranioca.



## Prijedlozi akata o regulisanju imovinsko- pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Jakupović Saiba, Lokvančić Mehmedalije, Musto Zehre, Sadiković Lutvije, Sadiković Ruždije, Šehović Salema i Tarić Senida. Usvojen je i prijedlog rješenja o rješavanju imovinsko-pravnih odnosa u svrhu legalizacije poslovnog objekta po zahtjevu Imamović Safeta, te prijedlog rješenja o rješavanju imovinsko-pravnih odnosa u svrhu legalizacije stambeno-poslovnog objekta po zahtjevu Gušo Marisa. Prijedlog rješenja o utvrđivanju prestanka prava raspolaganja Džigal Muniru, također je prihvatilo Općinsko vijeće Ilidža.

## Informacija o radu Drugostepene stručne komisije za period 21.4 - 2.10. 2017. godine

Vijeće je primilo k znanju Informaciju o radu Drugostepene stručne komisije za period od 21. april do 2. oktobra 2017. godine sa ocjenom stanja i prijedlogom mjera. Komisija je u izvještajnom periodu održala osam redovnih sjednica na kojima je razmatrala 22 predmeta, od kojih je 18 žalbi i četiri tužbe. Komisija je u okviru propisima određenih nadležnosti poduzela propisane radnje, vodila aktivnosti u cilju rješavanja po žalbama, te u zakonom propisanim rokovima provela žalbene postupke i donijela odluke i riješila sve zaprimljene predmete.





## Predstavljeni rezultati arheološkog istraživanja u Butmiru

**A**rheološka prospekcija lokaliteta prahistorijskog naselja Butmir pokazala je da je butmirska kultura preživjela i da se ovdje nalaze ne samo tragovi neolitske kulture, po kojoj je Butmir poznat, već i kulture bronzanog, željeznog i antičkog doba, kao i osmanskog perioda i srednjeg vijeka. Proteklih stotinu godina nije se znalo da li tu išta postoji, a 23. oktobra u Sarajevu predstavljeni su rezultati istraživanja iz kojeg stoje Komisija za očuvanje nacionalnih spomenika BiH, Federalni zavod za zaštitu spomenika pri Federalnom ministarstvu kulture i sporta, Institut za arheologiju Filozofskog fakulteta u Sarajevu, Udruženje "Društvo arheologa 1894", Njemački arheološki institut Berlin, Općina Ilidža i Hotel Hills Sarajevo. Inicijator projekta koji je počeo 2016. godine je prof. dr. Senaid Memić.

"Svakome ko brine o stanju historije i arheologije treba iskazati poštovanje i pažnju. Želeći da raščistimo stvari, četiri puta smo pokušavali kvalitetno istražiti cijelu teritoriju. Prvo istraživanje obuhvatilo je 80 hektara, nađene su četiri pozicije koje bi trebale biti zaštićene. To želimo zaštititi željeznom ogradom. Ovdje gdje je Poljoprivredni institut, nudili smo osiguravanje neograničenog broja radnika da se svaki gram zemlje ispita. Da ne stojimo i govorimo o historiji koje nema, već da nađemo sredstva i ono što treba staviti pod stakleno zvono i stavimo, a ono što čitav svijet treba da zna o Ilidži i ilirskoj kulturi, to ćemo reklamirati, samo nećemo trpjeti da se ne može ništa uraditi", rekao je načelnik Memić.

Doc. dr. Adnan Kaljanac s Katedre za arheologiju Filozofskog fakulteta u Sarajevu naglasio je da se nije znalo imamo li išta od butmirske kulture s obzirom na to se stotinu godina nije ništa radilo.

"Butmir je otkriven 1893. godine, a već godinu kasnije svjetski arheolozi koji su stvarali modernu nauku su došli i dijelom učestvovali u iskopavanjima. Do danas mi nismo znali koji prostor Butmir zauzima. Nekada se iskopavanje vršilo destruktivnom metodom, a mi smo pokušali pristupiti tome na drugi način. U saradnji s partnerima krenuli smo u neke manje invazivne metode, testne sonde, bušotine, utvrđivali smo geološke profile, geofizička snimanja i slično, da sa što manje oštećenja utvrdimo do kojih granica se prostire arheološki lokalitet, a ne u okvirima katastarskih čestica jer prahistorijski stanovnici nisu pratili granice modernog katastra, kao i utvrditi da li mi imamo išta od butmirske kulture s obzirom na to da stotinu godina nismo znali. Profesor Govedarice iz Berlina i druge kolege iz regije, svi nas pitaju možemo li otići do Butmira, mi tamo odemo, a nađemo kukuruz, jabuke, plug prolazi, " izjavio je Kaljanac.

On je dodao da su istraživači bili pomalo razočarani kada su na početku projekta pronašli ostatke zemunice, sjemenke žitarica u posudama koje su u njima ostale, ali, kako kaže, nisu pronašli Butmir.

"Istraživan je lokalitet Bare i dio poljoprivrednog instituta. Jedini Butmir koji smo tada pronašli bili su recentni ostaci prebačeni s nekog drugog mjesta još u vrijeme austrougarske gradnje. Ipak, definirali smo prostor od četiri



hektara koji sadrži ostatke bronzanog doba, naselje sa ostacima školjki, kuća, radionica za metalurgiju i objekata", riječi su Kaljanca.

Nakon dugih pregovora dobijena je saglasnost da se može krenuti u drugu kampanju na prostoru Poljoprivrednog instituta i Termalne rivijere, odnosno zemljište Hotela Hills.

"Jedan dio tog prostora nismo mogli istražiti. Nacionalni spomenik se nalazi na mjestu gdje su već izgrađeni objekti s podzemnim garažama i temeljima od kraja devedesetih do danas i mi smo se morali pomiriti s tim da tu nema arheološkog lokaliteta. Ipak, ono što smo uspjeli uraditi je u okolini Hotela Hills. Uspjeli smo očekivano utvrditi u prvim slojevima keramiku i nalaze iz antičkog perioda, pa bronzanog i željeznog doba, kompletne metalurške radionice uz studentski dom, a ispod toga smo sasvim slučajno, posljednjih dana istraživanja uspjeli pronaći naseobinskih kompleks butmirske kulture, podnice kuća, jednu smo otvorili u promjeru četiri metra, a samo na tom mjestu smo imali 153 nalaza butmirske keramike, sjekire, ognjište, tako da smo u potpunosti potvrdili da je Butmir na neki način preživio", istakao je doc. dr. Kaljanac.

Čitav ovaj prostor od 8,2 hektara arheološke površine sadrži elemente iz doba neolita, bronzanog, željeznog doba i antičkog Rima te nešto iz osmanskog perioda (potkovice, ekseri) i srednjeg vijeka.

"Sada znamo da i danas postoji naseobinski kompleks Butmira s ostacima butmirske kulture. Na ostalom prostoru jeste arheologija, ali nije izvorna butmirska kultura. Utvrdili smo cijeli proces života koji se ovdje odvijao. Butmir ne obuhvata samo period neolita, što je potpuno nepoznata činjenica. Tu se živi više od 7.000 godina i značajan je lokalitet", poručeno je.

## Općina Ilidža četvrta po broju uposlenih u FBiH

**P**rema zvaničnim podacima FBiH, Općina Ilidža je četvrta po broju zaposlenih u FBiH. Na osnovu podataka kojim raspolaže Vlada FBiH broj zaposlenih na Ilidži do 30. juna 2017. je 19.447, što je u odnosu na evidenciju od martu povećanje za 1.215 uposlenih.

Poslovno najperspektivnije područje je općina Tešanj, u kojoj je u posljednje dvije godine zaposleno blizu 1.750 osoba. Na osnovu podataka Vlade FBiH, za nešto više od dvije godine u FBiH zaposleno je ukupno 32.000 ljudi.





## Konferencija i izložba o vodosnabdijevanju i gubitku vode u vodovodnom sistemu

**K**onferencija i izložba o vodosnabdijevanju i gubitku vode u vodovodnom sistemu održana je 19. oktobra na Internacionalnom Univerzitetu u Sarajevu (IUS). Stručnjaci za vodovod iz Turske i BiH te predstavnici turskih firmi i domaćih vlasti razgovarali su o novim tehnologijama uz pomoć kojih bi se mogla stabilizirati vodovodna i kanalizaciona mreža u glavnom gradu BiH.

Erkan Ture, rektor IUS-a, rekao je kako ovaj događaj još jedan dokaz uključenosti Turske u razvoj i napredak infrastrukture Sarajeva. Učesnici konferencije razgovarali su o novim načinima regulacije vodovodne mreže, kontrole gubitka vode, novim pristupima upravljanja vodom i pritiskom te projektu smanjenja gubitka vode. Prisutnima je dobrodošlicu poželio i načelnik Općine Ilidža prof. Senaid Memić.

“Ilidža je glavni izvor za vodu koja je veoma važan resurs. Međutim, ove godine imamo velike probleme jer 20 godina nismo ništa ulagali u rekonstrukciju vodovodne mreže. Danas imamo dovoljno vode, ali gubimo je čak 70 posto. Moramo naći način da promijenimo situaciju, a za to prvo moramo promijeniti način na koji razmišljamo te prihvatiti nove tehnologije. Imamo dobre kapacitete vode, ali voda nam odlazi u rijeke. Moramo sve promijeniti. Pola miliona ljudi u Sarajevu sada brine za vodu. Kod nas inače svi znaju samo za političke probleme, a ne za tehnološke. Trebaju nam obrazovani ljudi. Napravili smo hiljadu grešaka s našom vodom i nadam se da će nam ovo poslužiti da shvatimo koji su naši problemi. Ne želim da nam neko daje sadaku, želim da se pazimo kao braća”, kazao je Memić.



Predsjednik turskog društva za infrastrukturu i tehnologiju izgradnje vodovodne mreže bez kopanja Yasin Torun, izrazio je zadovoljstvo što može pomoći Sarajlijama.

“Nadam se da ćemo kroz razmjenu znanja i vještina na ovoj konferenciji uspjeti pronaći rješenje za sve probleme u vezi s vodovodnom mrežom u Sarajevu”, naglasio je Torun.

Prilikom posjete IUS-u, nekoliko stručnjaka iz Turske prošle godine su imali priliku razgovarati o problemima nestašice vode u glavnom gradu BiH s Nezirom Hadžićem, tadašnjim direktorom preduzeća Vodovod i kanalizacija Sarajevo. Sada ih je primila nova v. d. direktorica Azra Muzur.

“Želimo u naš sistem uvoditi nove tehnologije. Borba s gubicima vode i rješavanje kratkoročnih gubitaka na dnevnoj bazi je primarno opredjeljenje nove uprave VIK-a. Imamo dovoljno izvorišta, ali je problem transport vode do krajnjeg potrošača, što je uzrok nedovoljnog ulaganja u popravke kvarova. Tome je posebno doprinio ratni period. Želimo popraviti imidž ovog preduzeća. Ovo nije samo komunalno preduzeće, već i strateško. Usvajat ćemo nove tehnologije kako bismo olakšali sebi, jer ne želimo se zamarati klasičnim metodama kopanja i iskopavanja. Dosad nismo koristili nove tehnologije, ali sad su nam itekako potrebne”, naglasila je Muzur.

## Posao za 22 radnika

**Š**vicarska kompanija Forster Rohner otvorila je svoj pogon i počela je sa radom u Hrasnici. Presijecanjem vrpce 19. oktobra 2017. godine načelnik Općine Ilidža prof. dr. Senaid Memić i vlasnik firme Alma-dr. S. d.o.o. Džemal Memagić ozvaničili su početak rada ove kompanije u ulici Put Famosa 38. U prvoj fazi zaposlile su se 22 radnice.

Kompanija sa sjedištem u St. Gallenu specijalizirala se za proizvode nastale finim i inovativnim vezom te doradu i ukrašavanje tekstila. Imaju pogone u Kini i Rumuniji, zapošljavaju oko 800 radnika. U ovom pogonu će se ručno i na jednostavnim mašinama raditi specijalizirani proizvodi finog veza koje nije u stanju napraviti visokoautomatizirana fabrika Forster Rohnera u Rumuniji. Elma Memić, direktorica firme Forster Rohner za BiH izjavila je kako će se u otvorenom pogonu proizvoditi najkvalitetniji i najprefinjeniji elegantni materijali čiji se proizvodi mogu vidjeti na modnim manifestacijama i koji



nemaju konkurenta kada su pitanju materijali ovakve vrste.

Radi se o visoko kvalitetnom i elegantnom materijalu koji se prodaje isključivo modnim kućama i izvoziće izvan granica BiH.





## Četvrta osnovna škola dobila novu sportsku plohu

Četvrta osnovna škola u Hrasnici dobila je novu sportsku plohu. Tim povodom, 20. oktobra 2017. godine upriličena je i svečanost povodom završetka radova. Učenici su dobili novi mobilijar, koševе i golove na samom igralištu, a nova ograda koja je postavljena značit će sigurnost, a onda sportske i dječije radosti.

Općina Ilidža je za ove radove izdvojila 80.000 KM. Presijecanjem vrpce načelnik Općine Ilidža prof. dr. Senaid Memić i direktor ove škole Hamid Guska proglasili su dvorište otvorenim.

“Vi ste naša budućnost. Vaša sreća i dobri uslovi za učenje naš je zadatak. Na ovom igralištu želim da budete sretni i zadovoljni i da igralište koristite maksimalno” rekao je načelnik Općine Ilidža prof. dr. Senaid Memić.

“Neizmjernu zahvalnost dugujemo načelniku Memiću koji je imao sluha i izdvojio ova sredstva da se 339 učenika mogu rekreirati, te zdravo razvijati” dodao je Guska, te najavio da bi ova škola uskoro mogla dobiti nove klupe, pametne table i stolariju.



## Mladim ljudima dat poticaj u razvoju poduzetničke inicijative

Na osnovu Pravilnika o kriterijima, načinu i postupku dodjele budžetskih sredstava za poticaj razvoju poduzetničke inicijative mladih na području općine Ilidža, općinski načelnik prof. dr. Senaid Memić donio je odluku o dodjeli sredstava. Na osnovu konkursa i utvrđene liste najboljih poslovnih planova, dodjelit će se novčana sredstva za poticaj i podršku mladim ljudima u svrhu registrovanja samostalnih djelatnosti i privrednih društava.

U Općini Ilidža 3. oktobra 2017. godine načelnik prof. dr. Senaid Memić uručio je ugovore kandidatima koji su ispunili uvjete konkursa i to: Merimi Delić 4.650,00 KM, Senadu Ibrićiću 5.000,00 KM, Rasemi Hadžić 5.000,00 KM, Semiru Isiću 5.000,00 KM, Maliku Krehiću 1.400,00 KM, te Nirmeli Jugo 2.300,00 KM.

“Želim vam uspjeh u budućem poslovanju. Neće biti lako, ali trudite se i radite kao Švicarci, Amerikanci i Njemci i vjerujete u sebe. Ne posustajte prilikom prve prepreke i nadam se da ćete biti u budućnosti neko kome ćete i vi pomoći” rekao je, između ostalog, načelnik Memić.

## Uručen 21 ugovor za (su) finansiranje projekata za mlade

Načelnik Općine Ilidža prof. dr. Senaid Memić uručio je 4. oktobra 21 ugovor aplikantima koji su ispunili uvjete konkursa na javnom pozivu za (su)finansiranje projekata za mlade iz Budžeta Općine. Za te namjene Općina je izdvojila 33.000 KM. Na prijedlog Komisije za odabir projekata za mlade, donesena je odluka kojim udruženjima će se dodijeliti sredstva.

Odobrena su novčana sredstva za: Udruženje mladih “Bez ograničenja”, Udruga “Libertas”, Udruženje Gorskog služba spašavanja i Streljački klub “Ilidža”, Udruženje za razvoj civilnog društva Motivator, Udruženje za očuvanje tradicije i razvoj kulturno-umjetničkog stvaralaštva “Bašlija”, Udruženje sportsko-rekreacijski klub “BeFit”, Udruženje “Kick Boxing akademija “Ilidža”, Udruženje učitelja Kantona Sarajevo, Udruženje Facultas za prosperitet mladih, Udruženje košarkaški klub “Igman”, Udruženje “Reformatio”.

Sredstva će dobiti i Udruženje za engleski jezik “English Club”, Udruženje za prevenciju ovisnosti “Narko-Ne”, Udruženje studenata elektrotehnike –EESTEC LC Sarajevo, Udruženje odbojkaški klub “Ilidža”, Odred izviđača “Vrelo Bosne”, Odred izviđača “Rakovica 9”, te Udruženje za poslovno usavršavanje i obrazovanje.

Načelnik Memić čestitao je učesnicima kursa kojima su dodijeljena sredstva i izrazio nadu da će realizacijom ovih projekata i idejama koje su istakli u njima, dati doprinos u poboljšanju odnosa u društvu.







## Nastavak izgradnje ceste Ilidža-Hrasnica

U toku su radovi na nastavku izgradnje saobraćajnice sa tramvajskim pojasom Ilidža-Hrasnica u dužini od 260 metara. Do sada je urađen široki iskop, zamjena materijala posteljice i položena oborinska kanalizacija. Trenutno se vrši nasipanje gornjeg sloja puta i polaganje ivičnjaka i asfaltiranje. Vrijednost radova je 423.133 KM. Izvođač radova je firma MGBH d.o.o i Sarajevoputevi, a nadzor vrši Zavod za izgradnju Kantona Sarajevo.



## Novi asfalt u Gornjoj mahali i u ulici Mustafe Ice Voljevice

UMZ Rakovica započela je rekonstrukcija ulice Gornja mahala. Dužina rekonstrukcije je 260, a širina 3,5 metra. Investitor je Općina Ilidža. Izvođač radova je firma Braća Mujić d.o.o, a vrijednost radova je 24.746,00 KM. U toku su radovi i rekonstrukcije ulice Mustafe Ice Voljevice u MZ Ilidža Centar. Dobit će se novi asfalt u dužini 115, a širini 7,5 metara. Općina Ilidža je za ove radove izdvojila iz Budžeta 20.500,00 KM, a radove povjerila firmi Braća Mujić d.o.o.

U ulici Bosanskih gazija u MZ Ilidža Centar u toku je rekonstrukcija i platoa. Površina platoa je 850 kvadratna metra. Investitor je Općina Ilidža. Izvođač radova Braća Mujić d.o.o. Vrijednost radova iznosi 26.455,62 KM.



## Zahvaljujući Općini Ilidža podijeljeno 44.568 kilograma povrća iz plastenika

Općina Ilidža je građanima u periodu od 2010. do 2017. g., dodijelila 519 plastenika površine 100 kvadratnih metara. Samo u 2017. godini dodijeljeno je 70 plastenika, ukupne vrijednosti 192.429,78 KM.

Na osnovu ugovornih obaveza korisnici dodijeljenih plastenika su Crvenom krstu i Merhametu, na području općine Ilidža, do sada isporučili 44.568 kilograma povrća.

Povrće je podijeljeno korisnicima navedenih organizacija, koje su velikodušno podržale ovaj projekat i iskazale veliku zahvalnost Općini Ilidža.







## Filmska projekcija za ilidžanske učenike

**Z**a oko 1.000 učenika devetih razreda 12 osnovnih škola sa područja općine Ilidža, učenika trećih i četvrtih razreda Četvrte gimnazije i Srednje tehničke škole grafičkih tehnologija, dizajna i multimedije organizovano je prikazivanje dokumentarnog filma „Čuvari kapije grada“. Projekcije su se održavale svaki dan u periodu od 16. do 20. oktobra 2017. godine u Multimedijalnom centru Ilidža(bivše kino Igman). Dokumentarni film govori o ratnom putu „Četvrte viteške motorizovane brigade“.

## Uručene knjige za biblioteke

**O**pćina Ilidža kontinuirano, a u skladu sa strategijama prema mladima, realizuje projekt pomoći bibliotekama u obogaćivanju knjižnog fonda nabavkom novih izdanja i literature za mlade ljude. Postojeći knjižni fond u bibliotekama ne može zadovoljiti potrebe mladih ni kvantitetom ni kvalitetom. Tako je Općina Ilidža i ove godine u svrhu pomoći bibliotekama u poboljšanju knjižnog fonda, nabavila 216 knjiga (49 naslova) koje je donirala JU Biblioteka Sarajevo-Bibliotečkom odjeljenju Ilidža, te bibliotekama u sastavu Javne ustanove za kulturu i rekreaciju Hrasnica-Ilidža, JU Četvrta gimnazija Ilidža i JU Srednja tehnička škola grafičkih tehnologija, dizajna i multimedije. Knjige koje bi mogle zadovoljiti interes mladih su izabrane po preporuci JU Biblioteke Sarajevo. Za nabavku knjiga Općina je izdvojila 5.850 KM.



## U Zoranovićima pronađene 62 mine

**U** projektu deminiranja „Zoranovići“ koje obuhvata područje od naselje Lasice do Zoranovića pronađene su do sad 62 protivpješadijske mine koje su uništene na licu mjesta.

Mole se građani s tog područja da se ne kreću u zoni deminiranja iz bezbjedonosnih razloga. Podsjećamo projektom deminiranja „Zoranovići“ će biti obuhvaćeno područje u površini od tri miliona kvadratnih metara, što je najveći poslijeratni projekat ove vrste u Bosni i Hercegovini. Općina Ilidža je za ovaj projekt izdvojila 300.000 KM. Izvođač radova je Udruženje „Centar za obuku pasa za otkrivanje mina“ iz Sarajeva.

## Sajam meda i pčelinjih proizvoda

**U** organizaciji Udruženja pčelara „Behar“ Ilidža, od 16. do 20. oktobra 2017. godine u ulici Rustempašina na Ilidži održan je sajam meda i pčelinjih proizvoda. Na sajmu je svoje proizvode izložilo 15 pčelara iz ovog udruženja. Proizvođači su istakli da su cijene povoljne, a med kvalitetan kojeg ove godine ima znatno manje.

Sajam je bio izložbeno-prodajnog karaktera. Osim pčelinjih, izloženi su bili i domaći proizvodi od voća, te razne prirodne kreme za kožu i ljekovito bilje.







## Obilježena godišnjica oslobađanja Hojte

U organizaciji Udruženja boraca Četvrte viteške motorizovane brigada Ilidža 30. oktobra obilježeno je 23. godine od "Operacije oslobađanja Hojte, Šiljka, Javorka, Lisičije glave, Kočarina i Ljuljove stijene". Predstavnici Općine Ilidža ispratili su, s Terminala, učenike osnovnih škola i to iz Prve, Druge, Četvrte, Pete i Osme osnovne škole "Amer Čenanović", za koje je održan historijski čas na lokalitetu Hojte o presudnoj bitci.

Brojne zvaničnice iz Općine, kantona, bivši komandanti, suborci, oficiri okupili su se kako bi se prisjetili bitke koja je imala veliki značaj za odbranu. Delegacije su položile cvijeće na spomen ploče heroja Ejuba Sarajkića kod hotela Maršala i na Bijelim vodama Jasminu Čengiću.



## Obilježeno 25. godina od pogibije Mehe Porobića i Ivice Stanića

U Azićima je 9. oktobra 2017. godine polaganjem cvijeća obilježen dan pogibije sarajevskih heroja Mehe Porobića i Ivice Stanića, dobitnika najvećeg ratnog priznanja Zlatni ljiljan. Delegacije porodica, boračkih udruženja, Općine Ilidža položile su cvijeće na spomen-ploče ovim braniteljima i odale im dužno poštovanje. Meho Porobić, pukovnik i načelnik štaba 102. motorizovane brigade, pored Zlatnog ljiljana, dobitnik je Ordena za vojne zasluge sa zlatnim mačevima, a ove nagrade su mu posthumno dodijeljene. Poginuo je sa saborcima 8. oktobra 1992. u borbama za Aziće. Na istom mjestu život je časno položio i borac, major Ivica Stanić, koji je ostao da brani svoje ognjište, a bio je pripadnik HVO-a.

## Samir Mehić novi predsjednik Upravnog odbora Udruženja boraca Branitelja Stupa

Samir Mehić je jednoglasnom odlukom delegata Udruženja boraca Branitelja Stup-Ilidža na skupštini 16. oktobra 2017. godine izabran za predsjednika Upravnog odbora. Mehić je izabran na mandatni period 2017-2021. godine.



## Uručena Zlatna plaketa posthumno Emilu Gavranoviću Bebanu

Emil Gavranović zvani Beban...Veseo, hrabar, pošten... U tri riječi tako ga opisuju stanovnici Butmira. Beban je sve to bio. Bio je jedina, omiljen u komšiluku, uvijek spreman svima da pomogne. Odrastao, živio, školovao se u Butmiru. Nije razlikovao ljude po nacionalnosti, niti ih je djelio. Imao planove za budućnost. Butmirani su se radovali Uskrsu, jer je tada njegova majka Danica bojila po 400 jaja. Djelili su svojim komšijama. Djelili dobro i zlo.

Njega su učili kako da bude heroj u Policijskoj školi. Ne čine heroja samo velika dijela, čini ga želja da učini ono što može. A on je to uradio 1992. Bio je pripadnik Specijalne jedinice MUP-a BiH. Stavio se u službu odbrane države, u službu naroda, svojih komšija. Dao je za ovu državu, ono najvrijednije, dao je život. Komšije ga nisu zaboravili. Željeli su da uruče za njega posthumno Zlatnu plaketu Četvrte viteške brigade. Majka Danica koja je imala samo njega trenutno živi u Splitu. Ali došla je. Ponosna je i tužna. Njenu bol uvijek nosi sa sobom i ne može prestati nikada, kaže, ali sretna je jer njene komšije nisu zaboravile ni nju ni njenog sina.

"Njemu su možda u školi rekli kako da bude hrabar, odvažan. Ali on je to nosio sa sobom. Pamtit ćemo ga po osmijehu, hrabrosti. Heroji se pamte, a ne zaboravljaju. A mi našeg Bebana nećemo" kazao je Fikret Delić, komandant Četvrtog bataljona Četvrte viteške brigade koji je uručio Zlatnu plaketu njegovoj majci 11. oktobra 2017. godine u Općini Ilidža.

Emil Gavranović zvani Beban je rođen 03. novembra 1968. godine u Sarajevu. Poginuo je 1993. godine, kao vojnik, pripadnik Specijalne jedinice MUP-a RBiH. Emil je bio jedan od najomiljenijih bosanskih specijalaca. Nakon konkursa za policajce u Specijalnu jedinicu došao je 1. augusta 1991. Bio je komandir tima po činu narednik. Bio je predan akcijama. Bosnu su sačuvali vitezovi poput njega. Posthumno je odlikovan „Zlatnom policijskom zvijezdom” i „Zlatnim ljiljanom”. Sahranjen je na groblju „Sveti Josip” u Sarajevu a kasnije na zahtijev majke 06. novembra 2002. godine posmrtni ostatci su preneseni u okolinu Splita (Hrvatska) odakle mu je bio otac, gdje trenutno živi njegova majka.





## “Mali vatrogasci” u Četvrtoj osnovnoj školi

Udruženje za zaštitu od požara i zaštitu okoliša “Mali vatrogasci” 25. oktobra 2017. god. je učenicima od prvog do petog razreda „Četvrte osnovne škole” održalo edukativne časove u sklopu mjeseca zaštite od požara i projekta “Vatrogasci naši prijatelji”.

Učenici su upoznati sa zanimanjem vatrogasac, opremom koju koriste vatrogasci prilikom intervencija, različitim situacijama u slučajevima požara i kako se u takvim situacijama ponašati. Realizaciju projekta je omogućila Općina Ilidža.



## “Bh stend-drp tragedy” i pred Ilidžancima

Monodrama “Bh stend-drp tragedy” komad je prvaka drame Narodnog pozorišta u Sarajevu i jednog od najvećih bh. glumaca Josipa Pejakovića, a 28. oktobra 2017. Ilidžanci su imali priliku u KSC Ilidža je i pogledati. Predstava je održana pod pokroviteljstvom načelnika Općine Ilidža prof. dr. Senaida Memića. Ulaz je bio slobodan. Ovoj monodrami je kako kaže Pejaković, posvećena velika pažnja i mudrost, a u drami je predstavljena Bosna u drugom svjetlu, a ne sa vicevima o Sulji i Muji, primitivizmu i onom čime smo bombardovani svih ovih godina kroz komedije.

“Monodrama govori o mom životu, o odrastanju, mladosti, rock and rollu. Želim dokazati da se ništa danas ne dešava što se već nije dešavalo i onda ponirem u prošlost. Ukazuje i na djela tada Husein-kapetan Gradaščevića koji je u 23 godini prepoznao budućnost BiH i da je pobijedio, odnosno izvojevao slobodu napaćenom narodu, narodima Bosne sve bi bilo drugačije” rekao je Pejaković i dodao da BiH mora biti iznad svakog interesa i da će opstati bez obzira na uticaje kojima žele da je podijele.



## Realizovan projekt “Očistimo Općinu Ilidža od e-otpada”

Na području općine Ilidža realizovan je projekat „Očistimo Općinu Ilidžu od e-otpada.“ Nositelj projekta je bio ZEOS eko-sistem d.o.o., a partneri su bili Aida-Commerce d.o.o., uz podršku Općine Ilidža.

Projekt je trajao od 27. septembra do 08. oktobra 2017. Sakupljanje je vršeno po dva sata u svakoj mjesnoj zajednici. U projektu Očistimo Općinu Ilidžu od e-otpada, učestvovalo je šesnaest mjesnih zajednica i sedam osnovnih škola.

Na mjestu sakupljanja je vršena kratka edukacija o važnosti i opasnosti e-otpada, reciklaži i doprinosu građana, a na informativnim pultovima građani su mogli preuzeti edukativne letke o vrstama otpada i kontejnerima za odlaganje istog u trgovačkim centrima. Na kraju projekta je podijeljeno šest nagrada građanima koji su učestvovali u projektu.

Ovim putem apelujemo na podizanju ekološke svijesti građana, jer građani u velikoj mjeri svoj e-otpad odlažu u kontejnere zajedno sa miješanim komunalnim otpadom.

U toku 2018. godine planirano je postavljanje jednog kontejnera za e-otpad ispred Općine Ilidža.



## Svjetski dan jabuke obilježili i učenici Druge osnovne škole

Učenici Druge osnovne škole obilježili su 20. oktobra Svjetski dan jabuka. Učenici su Svjetski dan jabuka odlučili obilježiti sevdalinkom „Ja zagrizoh šareniku jabuku“ i podjelom sočnih jabuka svakom đaku na velikom odmoru.

Poznata je narodna poslovice koja kaže: „Jedna jabuka na dan tjera doktora iz kuće van!“. Sama ova poslovice govori o značaju ove voćke, koju inače zovu i „kraljicom voća“. Korisna je u jačanju imunološkog sistema organizma, te uspješno djeluje u borbi protiv bakterija i virusa.







## Šesta osnovna škola pobjednik na međunarodnom takmičenju „Danube art Master“

**R**ad učenica Nejle Čavčić i Amne Karović, osmog razreda iz Šeste osnovne škole, koje su radile kao članovi ekološke sekcije pod rukovodstvom učiteljica Elme Šetić i Aline Karović Rahimić 10. oktobra 2017. je nakon pobjede na državnom takmičenju, ostvario pobjedu i na Međunarodnom takmičenju - Umjetničko stvaralaštvo na Dunavu. Pobjednički rad „Most- rijeke spajaju ljude a mostovi spajaju obale“ je kreativni umjetnički rad koji je napravljen od plastičnih boca i plastičnog otpada, most koji oslikava povezivanje djece koja grade mostove i koji će se spojiti sa drugima a prema čistijem Dunavu, bez plastičnog otpada.

Međunarodni Art Master je odabran od pobjednika državnih Art Mastera koji su se takmičili u 12 zemalja dunavskog sliva uključujući Austriju, Bosnu i Hercegovinu, Bugarsku, Hrvatsku, Njemačku, Mađarsku, Moldaviju, Rumuniju, Srbiju, Slovačku, Sloveniju i Ukrajinu. Svi učenici i škole iz ovih 12 zemalja su pozvane na učešće. Učestvovalo je oko 2000 djece a samo 280 radova je podnešeno budući da je većina takmičara radila u većim timovima.



## Vladimir Kanevčev, državni prvak

**U**Čapljini je 14. i 15. oktobra održano Državno prvenstvo u boćanju u pojedinačnim disciplinama. Na prvenstvu su učestvovali takmičari iz BK „Napredak“ sa Stupa. Član ovog kluba Vladimir Kanevčev je postao državni prvak u finalu, pobjeđivši Antu Juku sa 13:4.



## Održani sportski susreti invalida

**U**organizaciji Udruženja za sport i rekreaciju invalida Općine Ilidža 29. oktobra održani su tradicionalni sportski susreti za osobe sa invaliditetom. Učestvovalo je 68 sportista. Najuspješnija je bila ekipa iz Tuzle, a ekipa domaćina je ostvarila zapažene rezultate i to šah, ekipno prvo mjesto, drugo pojedinačno, streljaštvo ekipno treće mjesto muškarci i drugo mjesto žene, te drugo mjesto pojedinačno šulen, ekipno treće mjesto žene.

## Održan kantonalni turnir u šahu

**U**organizaciji Šahovskog kluba „Igman“ Ilidža u prostorijama Šahovskog kluba „Bosna“ Sarajevo 24. septembra 2017. godine održan je turnir u brzopoteznom šahu Kantona Sarajevo. Na turniru je učestvovalo 15 igrača iz svih klubova sa područja Kantona Sarajevo, koji su igrali svako sa svakim pet minuta po igraču. Poslije odigranih 14 kola prvo mjesto osvojio je Bojan Kurajica, drugo Amir Hadžović, treće Rijad Burović, četvrto Senad Kamberović, peto Adnan Bandić, šesto Halid Strinić i sedmo Sead Rašidović. Pobjednicima su uručene prigodne novčane nagrade.







## Meris Muhović osvojio srebro, Anes Čongo bronzu u Salzburgu

**T**akmičari Karate kluba “Champion” nastupali su u Salzburgu na kvalifikacionom turniru za Olimpijske igre 2020, te ostvarili odlične rezultate.

Naime, u konkurenciji 174 takmičara u kategoriji -84 kg, dvojica članova Karate kluba “Champion” domogli su se podijuma, te najavili da će biti izuzetno konkurentni kada je u pitanju nastup na OI Tokio 2020.

Meris Muhović je nakon sedam borbi osvojio srebrnu medalju, a u finalu je poražen od bivšeg svjetskog i evropskog prvaka Francuza Kenjija Grilona. Do finala je pobjeđivao Japanca Kaija Kudoa, Austrijanca Thomasa Reindla, Švicarca Kola Kabashija, Turčina Furkana Orogula i njegovog sunarodnjaka Emrea Cevahira.

U kategoriji -84 kg Anes Čongo je osvojio bronzanu medalju. Za plasman u finale Anes Čongo je poražen upravo od Grillona, koji je pobjednik u ovoj kategoriji. Do polufinala Anes je pobijedio Švicarca Iliju Letića, Nijemca Marcela Bauna, Francuza Farouka Abdesselema, Kosovara Tahira Ajvazija, a u meču za treće mjesto pobijedio je Azerbejdžanca Aykhana Mamayeva.

Zapažene rezultate ostvarili su i ostali predstavnici Karate kluba “Champion”, Edin Sarić koji je osvojio peto mjesto u kategoriji +84 kg, te Ervin Galić koji je poražen u meču za plasman u polufinale kategoriji -67 kg.

Predsjednik KK “Champion” Mensur Agović zahvalio je Općini Ilidža i Općinskom vijeću na podršci koju pružaju ovom klubu.